

國朝先正事略

國朝先正事畧卷之八 名臣

平江李元度次青纂

高忠烈公事畧

子其佩

文恪公其位

猶子文良公其

高公諱天爵。字君寵。漢軍鑲白旗人。後以子其位任大學士時。改隸鑲黃旗。先世居鐵嶺。父尙義。隨征松山。杏山。及太原有功。子輕車都尉世職。公少讀書。善騎射。慷慨重義。順治四年。由貢生除知高苑縣。躬擐甲。捕巨盜謝千等。博興縣爲賊所陷。公夜率眾馳救之。賊皆遁走。遷知信陽州。以經畧洪承疇薦。擢長沙知府。大兵進攻明桂王。公奉檄理軍餉。聞父病。力請去官。十六年。再授江西建昌府。先是。廣昌山賊王昂。傅勝等聚眾數千。踞

羊石滴水二砦爲老巢時出劫掠砦勢險峻官軍仰攻輒不利因罷攻招之降王昂傳勝佯就撫仍伺隙煽亂官軍擒之斃於獄餘賊益負固抗拒乃依山立柵困之十八年夏公與巡道張永祺等定計乘風雨交作時分布官軍直搗滴水砦破之進攻羊石砦並截賊去路斬馘千餘傷斃及墮崖死者無算因赭山鑿險以絕後患生擒賊渠幸連升周由義等及王昂之父王尙智所掠丁口悉還其家事聞得優敘在建昌最久多善政康熙十三年遷兩淮鹽運使未行耿精忠據福建叛出兵攻建昌或謂可亟去公慨然曰吾守此土十六年雖受代豈可遽去當殉此城耳時城中將吏多陰從賊公知事不可爲乃命其子奉母

從閒道出自跨馬率家僮數十人禦賊萬年橋賊不能越守將趙印已降賊。乘公力戰時從後縛之遂執以入閩累誘降皆不屈繫獄中越歲餘公與副將王進等謀遣千總徐得功出仙霞關請大兵入閩陰結死士爲內應謀洩被害時十五年九月四日也。詔贈太僕卿廕一子三十五年福建巡撫卞永譽請以公及福甯總兵吳萬福福州知府王之儀邵武知府張瑞午建甯同知喻三畏邵武同知高舉侯官知縣劉嘉猷尤溪知縣李璵福州城守廖有功等合祀省城西門外得旨允行四十六年子其佩官浙江溫處道爲父請隔額。御書蓋臣義烈額其家祠復請諡。特賜諡曰忠烈雍正四年長子其位官大學士。

其佩官都統同奏請 諭祭得 旨高天爵捐軀殉難大節可嘉高其位高其佩乃現大學士都統大臣爲父請卹甚是。可加贈禮部尙書銜。追賜卹典。七年入祀昭忠祠。

其佩字韋之一字且園。公第五子也。由宿州知州內遷員外郎。出爲溫處道。坐署運使虧鹽課奪官。尋開復。五十四年補四川永甯道。就遷按察使。雍正元年內遷光祿卿。擢刑部侍郎。晉都統。仍兼刑部侍郎。三年夏。命同侍郎史貽直往西川審理年羹堯誣罰茶商私佔鹽窩各款。又陝西郿陽縣因私鹽致死無辜八百餘人事。皆得實。五年坐讞獄失入。奪侍郎。仍留都統任。尋罷其佩。天資超逸。工詩。兼善指頭畫。海內珍之。

其位字宜之一字。體國初由筆帖式管佐領。康熙十三年吳三桂陷湖南。順承郡王勒爾錦統師征之。其位從征至襄陽。會總兵楊來嘉叛。命其位率二十騎覘虛實。猝遇賊眾二萬人於土地嶺。其位出其不意衝突之。賊驚潰。且斫且馳。至南漳入城守。禦衣上血模糊。刀刃盡缺。叛賊譚洪率舟師三萬向鄖陽。其位以百人扼楊溪埔。賊蜂擁至其位據崖射賊。矢無虛發。相持七十日。糧盡煮馬鞍以食。誓必死。會副都統李麟隆擊破賊。乃全師歸。由是每戰必先登前後給功牌十有二。薦擢襄陽總兵。五十二年擢湖廣提督。賜孔雀翎及囊鞬鞍馬。五十六年自陳乞罷。諭嘉其和輯兵民聲望素著。令供職如故。六十年調江

南提督。明年特命署兩江總督。雍正元年入覲。命仍回提督任。四月疏請保護。

聖躬得旨。此奏字句之外。實有一片愛君之心。發乎至誠。非泛泛虛文可比。尋疏言。松江之泖湖。澱湖。澄湖。港汊紛歧。與浙江錯壤。與太湖毘連。經兩省督撫與臣委官勘議。防奸法計。松江所屬通船要口百十有三處。釘椿立柵。以時啟閉。官捐工料。百姓樂趨。事已將次告成。手勅報曰。權宜措置。必無礙商民。乃善。尋賜御製詩有裨益軍民資偉畧。劑調文武在和衷之句。二年奏進黃浦漁人所網得雙夔龍。紐未刻玉印。諭曰。此事若出自他人。朕不信也。卿乃忠實老臣。斷不至有捏造虛誣。

之舉。今賜卿四圍龍補服等物。以示嘉悅。三年夏。

世宗諭廷臣曰。高其位前署總督時。年羹堯奏其年老衰憊。兩耳重聽。恐貽誤地方。及朕卽位。猶記羹堯之言。特召來京。陛見觀其人。老成忠厚。善氣迎人。雖已老而精力尙可用。卽此可見羹堯之險詐也。九月。拜文淵閣大學士。兼禮部尙書。加太子少傅。公以衰老不勝機務。辭。弗許。四年五月。至京。改隸鑲黃旗。尋乞休。諭以跪拜艱難。高年常有之事。不必遽求退。十月。公八。才生辰。賜匾聯及服食等物。白金一千兩。十一月。復乞休。得旨。卿宣力年久。老成練達。茂著賢聲。是以簡任機務。用昭優眷。前次乞休。朕未忍俞允。今復奏請。情詞懇切。可原官致仕。五年。

正月薨。命王大臣侍衛奠茶酒。賜祭葬如例。諡文恪。十二年。詔入祀賢良祠。次子續勳襲世職。長子起山任子授茂州知州。遷漢中知府。荆南道。內遷光祿少卿。康熙三十一年。擢副都統。晉兵部右侍郎。雍正十三年。擢兵部尚書。尋以都統銜在雍和宮行走。未幾卒。

其倬字章之。號芙沼。忠烈公猶子也。父廕爵。任口北道。其倬由康熙三十三年進士選庶吉士。乞假歸。閉戶讀書數年。始就職。授檢討。

聖祖奇其貌。欲試以外事。會四川有獄未決。命往訊歸。上問打箭爐形勢。口陳手畫。沈詳不煩。

上器之。命典試四川。遷中允侍講。督山西學政。再遷侍講學士。擢內閣學士。五十九年。巡撫廣西。會鄧橫苗叛。單騎入寨諭以朝廷威德。眾棄刃羅拜受約束。而還。逾年。擢雲貴總督。土司承襲向有陋規。吏胥每因文結舛錯。藉端需索。公嚴行禁革。先是青海台吉羅卜藏丹津肆逆。謀進西藏。公以雲南中甸爲進藏咽喉地。請調鶴麗劍川兵鎮之。墾田涼州。積穀備運。收哀牢土司爲流官。苗民蠢動。遣兵迎勦。大小三十二戰。平魯魁茅洞諸寨。逆渠先後就俘。二年春。青海平。中甸諸番目攜三千五百戶。繳偽劄。納土歸誠。公疏聞。并條奏中甸善後事宜五則。魯魁山善後事宜九則。

上嘉其妥協。璽書褒美。賞騎都尉世職。尋勦平貴州狝家苗叛酋阿近等。諭部優敘。復條奏貴州苗疆事宜八則。下部議行。三年。加兵部尚書。太子少傅。十月。調閩浙總督。瀕行。奏請豁除雲南鶴慶府。鄧州。嵩明。騰越三州。六和浪穹二縣。重輸軍賦。允之。行抵浙東。聞福建饑。卽請撥溫台倉穀七萬石。運閩平糶。四年。疏陳福興。漳泉等府地狹人稠。自平定臺灣以來。生齒日繁。無田可耕。勢且流爲盜賊。從前海禁過嚴。請弛禁以廣謀生之路。詔下。怡親王會同大學士九卿議行。五年。擒勦臺灣兇番骨宗等二十名。各社相繼歸誠。十年。詔以李衛爲浙江總督。命其倬專督福建。六年。條奏福建鹽政事宜四則。部議

從之。又以原任御史蕭震當耿逆叛時。與邵武守張瑞午等合謀討賊。事洩被害。妻妾媳婢皆死之。瑞午業蒙卹典。而震獨遺疏請入鄉賢祠致祭。旌其門。詔如所請。七年秋。入覲。賜御製詩。有操懷冰霜功帶礪。匡時重鎖眷良臣之句。八年。晉太子太保。調督兩江。先是。

上以其倬通曉堪輿術。命詣

福陵恭視形勢。工程至是復命來京。隨怡賢親王相度萬年吉地於易州之太平峪。諭嘉其悉心籌度。實出於忠愛。至誠。特授輕車都尉。并前所得騎都尉爲三等男。尋署雲貴廣西總督。九年。疏言雲南昭通府四面環山。請委官專辦墾務。定

爲水旱生熟四項分給兵民獮土各戶墾種按年收穀還本後起科輸米以省兵米運費下部議行十一年命仍回兩江任會普洱府屬思茅土目刀國興等煽亂遣將討平之擒其酋并賊屬五百餘人九月詔以總督銜管江蘇巡撫事尋坐瞻徇左遷巡撫十三年疏劾淮關監督年希堯庇縱玷職黜之乾隆元年以疾召還京未幾授湖北巡撫調湖南二年湖南城步綏甯獠糾黨焚劫遣將分剿之賊黨平命優敘三年擢工部尚書調戶部十月薨於寶應舟次年六十三遺疏入優詔悼惜沿途遣官弁護送回旗尋賜祭葬予謚文良公揚休玉色進止嚴重目不能遠視無事輒暎開則精光射人爲人淵深

凝靜每奏事。天諸褒嘉。或忤旨。旦夕禍不測。而公施施如平時。人欲窺公顏。卜主眷盛衰。不可得也。

世宗知公寬不能掖之。使奮代人匿瑕藏疾。至累及終。不悔然於國。憲民瘼大綱必舉。中外推鉅人。長德無異詞。故雖詔書追責而封疆重任。十三年如一日。西師大事必密與謀。青海降酋和羅爾邁逃。

上以問公。公奏有之不爲多。無不爲少。宜撫其不逃者。愧其逃者。

上嘉納焉。孫文定嘉淦少時殺人報仇。公督學時脫其罪。終身執弟子禮甚恭。李敏達衛任瀕藩時。與安南爭鉛廠河。有旨

國朝文正公集卷之八
切責公引爲已咎李慚感次骨松江提督補熙將之任

上慮公在江久不無裨政 命補察劾 旨甚嚴及抵江聞眾
稱公賢以實奏

上曰補熙不迎合樸誠可嘉卽擢總漕嗚呼公與補皆不可及
而

世宗之神聖爲何如也所著奏疏十卷味和堂詩集八卷公少
以詩名稱一代作手繼配蔡夫人綏遠大將軍毓榮女亦能詩

甘忠果公事畧 李興元

甘公文燭字仲明其先江西豐城人後徙遼東父應魁從
世祖入關隸正藍旗漢軍官至副將公幼事母至孝稍長好讀
書精騎射負志節以父廕讓其弟由筆帖式擢啟心郎改大理
少卿康熙二年遷順天府尹以法繩下貴幸家皆斂迹崇文門
稅苛露章奏之六年巡撫直隸先是郝都憲惟訥以督撫親巡
屬邑官吏因緣派累民間奏罷巡歷例公疏言巡撫不巡視所
屬則吏治民隱無由悉知如其不賢則雖坐守會城而苛屬擾
民之事不一若果賢必自愛名節輕騎減從纖毫不以累民而
年歲豐歉民間利病有司貪廉悉無遁情請仍 敕令巡視但

申嚴苛擾例禁疏下部寢其議

聖祖特詔允行著爲令公單騎巡所部禁暴卹郵緝姦除盜知無不爲疏報保定眞定等屬秋雨爲災請全蠲歲賦其已征夏稅流抵來年部議止按例減免特旨全蠲其已征者許抵來年之數公復劾昌平順義懷柔密雲文河各州縣遲報水災論如律七年擢雲貴總督奏禁各驛站於額役夫役外派民協助時吳三桂駐雲南總督駐貴陽三桂蓄異志久僭侈踰法公持大體多所裁抑又以時訓練部兵申嚴紀律思制其孽芽三桂頗憚公威名未卽發乃詭報土番康東入寇又陰嗾凱里諸苗煽亂羽檄交馳以覘公措置公料康東無能爲凱里近在肘腋

先督兵進剿陣斬賊酋破其巢。餘黨悉平。旋以進剿康東師期移檄雲南而三桂果以康東遠通告公以滇疆遼闊疏請巡視。因徧歷所屬。疏言黔滇山路崎嶇且多瘴癘凡官吏卒於任者請給勘合由驛歸其櫬下部議行。十年秋以疾求罷。溫旨慰留尋丁母憂。命在任守制。逆苗阿福倡亂遣兵搗其寨擒斬之。再疏乞假歸葬許之。三桂請以總督印交雲南巡撫署理因假訓練爲名盡調督標兵赴滇厚結之。十二年十月公還貴陽任事。標兵被煽誘莫聽調遣。當是時朝廷方允三桂撤藩之請。三桂期以十一月二十四日起行。陰結黨羽謀反。先期三日戕雲南巡撫朱國治分遣逆黨逼貴陽。公聞變卽遣族弟文燭賁

疏入告中有云。城存臣存。城亡臣亡。急牒提督李本深。使領兵扼盤江上流拒賊。適本深以書來覘公意。中多遁辭。公手書答之曰。吾輩忠孝自矢。建樹正在今日。尙其同心協力。手足相依。萬一不濟。惟有效張巡南霽雲以身殉國。若稍二三。其德遺馨遺臭千里。毫釐也。而本深與滇撫曹申吉已從賊。公見諸將吏無一可與謀者。度貴陽不能守。惟鎮遠地勢險阻。外可號召。荆楚之兵。內可抗拒。黔滇之隘。力遏兇鋒。事猶可爲。是日安盛氏率婦女等七人自經死。公卽馳赴鎮遠。至則守將江義已反戈相待。公揮鞭渡河。抵吉祥寺。義以兵環之。公下馬歎曰。封疆之臣。義死封疆。過此則非黔地矣。整衣冠望闕再拜。遂自刎死。

年四十有二子國城及筆帖式和善雅圖從死焉公殉節後賢
髯。蝟。張。雙。目。猶。視。生。氣。懷。懷。士。民。見。者。皆。隕。涕。遂。共。殮。瘞。於。寺。
側。後。數。年。吳。逆。既。平。黔。撫。楊。公。雍。建。疏。陳。公。政。績。及。死。事。狀。得。
旨。優。恤。并。允。直。隸。巡。撫。于。公。成。龍。請。遣。其。長。子。宣。化。同。知。國。均。
迎。櫬。至。京。至。之。日。

上遣大臣迎奠盧溝橋。贈兵部尚書。賜祭葬如禮。予諡忠
果。詔立碑表其墓。廕子國璧入監。貴州士民請建專祠於貴
陽。御書勁節二字額其祠。雍正初。詔祀昭忠祠。國璧官至
雲南巡撫。

朱公國治。漢軍正黃旗人。世居撫順。國初入包衣籍。順治中。

由拔貢除知固安縣。以政最。再遷霸昌道。入爲大理卿。擢江甯
巡撫。亡何以憂歸。服闋起雲南巡撫。康熙十二年。爲三桂所執。
罵賊不屈死。事聞。贈戶部侍郎。優詔議卹。命由驛歸櫬。尋
賜祭葬。雍正七年。入祀昭忠祠。卹其子孫。令出包衣籍。同時死
難者。爲雲南按察使李公興元。字若始。直隸遵化人也。以康熙
十年。莅雲南。方正執法。嚴抑藩兵。毋許違禁取利。及準折民間
子女。部民德之。吳逆之變。脅授僞職。不從。杖之下獄。尋安置蒙
化府。拘禁六年。終不厝。與雲南知府高顯辰同知劉崑先後遇
害。子廕秀奇秀從死。卹贈太常卿。廕一子入監讀書。

傳忠毅公事畧

公姓傅氏諱宏烈字仲謀號竹君江西進賢人父應期明季令廣西鼎革後阻寇不能歸公少負大畧王師定兩廣以人材應募順治十四年總督王國光薦授韶州同知康熙二年遷慶陽知府七年疏陳平西王吳三桂陰謀不軌狀請早爲之所部議坐公離開王大臣逮繫論斬

聖祖特旨減辟戍梧州十二年冬三桂反廣西將軍孫延齡提督馬雄叛應之遣提督郭懋禕捕公甚急公投水求死懋禕出之送延齡所公以忠孝說延齡且言三桂必敗毋與其禍延齡有悔心其妻孔四貞定南王有德女也亦與公言感

大皇太后恩不願從賊時吳逆僞黨四布延齡令公往南甯聯
合交趾接應大兵圖反正公因陽附三桂受僞將軍職得出入
賊黨中且密約平南王尚可喜共圖恢復十六年春遣人至贛
州致書鎮南將軍舒恕言孔四貞不忘國恩孫延齡可招撫
狀先是廣西巡撫馬公雄鎮爲延齡所害朝命豚爾吉督辦
廣西軍務公復致書麻公言大兵若速進南安宏烈從韶州策
應則兩粵可計日定舒公麻公先後陳奏得旨傳宏烈圖報
國恩忠誠懋著可卽授廣西巡撫會將軍莽依圖復南安進克
南雄抵韶州公迎見拜巡撫之命疏言逆賊吳三桂蓄謀不
軌臣首發其奸廷臣惟恐激變凡供詞涉三桂一字不錄臣憤

激願死。自引罪蒙 特恩免死。安置梧州。嗣三桂反。廣西布政使李迎春等苦勸臣從。臣憤不欲生。自投江水。誓爲厲鬼殺賊。漂流十里。遇救不死。因思不入虎穴。焉得虎子。乃投身賊地。從中反閒。又假他事赴南甯。入思州泗城廣南富川諸土司。及交趾界。聯絡義勇。助平南王尚可喜軍。可喜病篤。猶執手相勸令速復肇慶。遂與其子之信合謀討賊。擊敗僞將軍楊鎮邦。僞總兵古元隆等。乃得由龍南達贛州。歸命 朝廷。以展夙志。三桂自聞肇慶規復。百計欲殺臣。而終不得遂計者。隨臣義勇五千人。實賴其力。請畱爲援勦營。量給糧餉馬匹。並請 勅尙之信遣兵合勦。得 旨。覽奏詞意忠懇。可加授撫蠻滅寇將軍。廣西

巡撫如故。尙之信速遣所屬官兵。與傅宏烈同定廣西。並命
總督金光祖給銀十萬兩。俟秋涼再發馬匹。尋命戶部加撥
銀十萬解赴軍前。公率兵敗賊於韶州。擒斬偽總兵王雲龍等。
遂進征廣西。擊走偽將軍趙天元。復梧州。分遣總兵曾大熾等
攻克昭平賀縣。又招降鬱林州博白北流陸川興業等縣賊眾。
會逆黨復犯梧州。公遣總兵楊國泰等。水陸夾擊。陣斬偽總兵
張元。乘勝復潯州。尋遣知府劉曉寰疏。縷陳進剿機宜。諭獎
公謀畧優長。忠貞夙篤。恢復梧潯等處。屢奏膚功。覽所奏進剿
機宜。矢志滅賊。深堪嘉尙。可加太子太保。所屬將吏。同心報國。
其各加敘一級。初。馬雄之叛也。公家屬百餘人。盡陷賊中。叛逆

李迎春執送吳三桂與總兵楊國泰及諸將士家屬並遇害至是公疏聞。諭獎其爲國忘家。下所司優恤。時馬雄方踞柳州。三桂逆黨分踞平樂南甯橫州。勢張甚。公欲借尙之信兵力。共取平樂。乘孫延齡已謀歸順。赴桂林駐守。請勅之信遣兵繼進。之信以防守廣東爲辭。公向借大礮及營馬皆不應。三桂知延齡不附己。遣其從孫世琮及賊將馬寶等掠桂林。給延齡出城殺之。旋陷平樂。伺公方赴南甯招撫土司。遂襲梧州。公移師擊斬賊乃遁。十七年與將軍莽依圖進圍平樂。賊水陸抗拒。我兵失利。退保中山鎮。莽奏公所部先卻。江水泛漲。孤軍難久。畱公奏莽公所部不相應援。仍自請議罪。

上諭王大臣曰。傅宏烈所領官兵。從未支領奉餉。奮勇收復諸路。嗣以規取黔滇。請發大軍並進。因令莽依圖協力進取。不意莽依圖抵平樂。藉口緣旗兵失陷。退至賀縣。又稱糧乏。退保梧州。致傅宏烈所復城池盡棄與賊。其嚴飭痛改前非。以圖後効。公尋奏戰守事宜。諭曰。覽所奏安人心。固內地。勦賊之策。悉備。其勦爲之。尋疏報勦賊容縣之西山大捷。復北流縣。五月。疏報偕都統貝勒等。率兵自北流陸川博白進勦。斬僞總兵梁子玉等。復鬱林州。及興業陸博白等縣。又疏報招降僞總兵何興。及所部萬餘人。均下部議敘。六月。賊兵數萬渡左江。我兵與戰。失利。退守藤縣。十月。賊併力來犯。藤縣失守。遂逼梧州。十八年。

五月吳世琮犯梧州公分布水陸官兵奮力夾擊殲賊二千有奇。世琮棄營遁遂遣總兵譚昇等復藤縣進定平樂桂林並招諭僞總兵王定邦等五人各率所部降時賊將范齊韓等尙踞粵西公遣游擊鄧林材會合馬承應兵進剿遂復柳城融縣馬承應者故提督雄子也雄叛降三桂踞柳州病死承應領父眾封僞懷甯公見公擊敗吳世琮乃請降公以所部騎悍奏請仍以承應統轄詔授承應伯爵給昭義將軍印是年冬公疏辭巡撫任願統兵進剿黔滇疏言進征雲貴多山險騎兵未可專恃必用綠旗前驅而進兵之路廣西爲要湖南次之今兩廣綠旗肯爲朝廷捨命殺賊者惟臣標兵逆賊未滅臣不敢偷安

見遣參將溫紹賢等。選精兵三千五百。從小路進取貴州之黎平。湖南之靖州。斷賊楓木嶺餉道。又調馬承廕兵四千駐慶遠。以分賊勢。臣俟命下。卽率兵進發。會合湖南兵努力前驅。詔如所請。行十九年二月。公至柳州。疏言。柳州兵不下三萬。逆賊百端煽誘。人心不一。近以乏餉鼓譟。臣欲擒誅首惡。恐激變。是以暫示姑容。此軍積成驕悍。必俟賊平後陸續解散。見在馬承廕所部。乞勅盡給糧餉。先收七千人心。鼓勵從征。庶不爲內地變患。疏上。未及報聞。而承廕請公往。申號令。眾謂承廕反覆不可信。公曰。人已降。奈何疑之。率數十騎往。諸將慮有變。率兵尾行。公不知也。承廕見兵踵至。疑執已。遂激眾再叛。執公。送

貴陽時三桂已死其孫世璠僭號居貴陽也世璠夙重公威名誘以偽職公罵曰爾祖未反時吾卽劾奏知爾家必作賊恨不早滅爾家肯從賊耶旋復百計說之罵益厲遂遇害十一月將軍穆占攻復貴陽收骸骨以聞

上曰傅宏烈宣力廣西陷賊不屈徇難捐軀忠節可憫下所司優卹令由驛歸櫬贈太子太師兵部尚書賜祭葬予諡忠毅廕二子七品官公前後請留中密疏如預陳尙之信反狀及安置投誠官兵籌畫勦撫鎮守機宜皆中肯綮沒後奉聖祖特旨盡出其前後密奏宣布中外昭示忠悃焉其論劾尙之信也言之信歸正後怙惡不悛在廣東賣官虐民抄家充餉

重斂橫征時而疏請出兵湖南時而疏請平定廣西及 命下
則一兵不發目中竟不知有 君命臣前此隱忍調停欲導其
爲 朝廷出力既而知其反覆變詐故厚集兵力以爲東西未
雨之防今三桂已死餘孽蕩平在即之信必無能爲請於肇慶
設滿洲將軍或易滿洲總督帶旗兵駐守彈壓削之信藩封遣
散所屬設水師提督以分其權庶兩廣得以久安其論安置降
軍也言臣甫至桂林孫延齡舊部請糧請餉呼告盈門野性難
馴養之必無益然又未可猝散宜仍立藩旗照額支餉以滿洲
將軍駐省署理藩旗俟賊平後撤回京師至投誠賊將各帶兵
馬若不用則必生心且無以勸來者用之則名器太濫不成體

制宜。各照偽銜給劄。令偽將軍赴部補用。其總兵副參游及交戰等官。或願赴部。或願在督撫將軍軍前補用者。聽庶各爲官。可以解散。其論鎮守事宜也。謂長治久安之策。凡衝要地均宜。照江南陝西例。設滿洲將軍駐防。以制反側。文臣事權不宜太輕。藩臣兵權不宜太重。趁此軍威大振之日。宜善爲布置。密爲解散。以固億萬年不拔之基。奏入。

上並聽其言。以密疏示議政王大臣。後皆如公策。當康熙初。三藩分鎮。勢傾朝野。吳逆尤鴟張。擁兵數十萬。分十鎮。運七布政使司錢糧。協濟之。將吏遷除。號曰西選。詔吏兵二部不得掣肘。在廷皆知其有異謀。然無敢明言者。公以一知府抗疏發其

奸。瀕。九。死。不。悔。斯。已。奇。矣。及。三。桂。反。黔。滇。川。楚。閩。粵。並。爲。賊。有。
江。浙。陝。西。湖。北。亦。被。兵。失。陷。郡。縣。察。哈。爾。布。爾。尼。復。反。於。漠。北。
山。西。駐。防。蒙。古。兵。叛。應。之。其。安。靖。者。京。師。及。山。東。河。南。而。已。當。
是。時。天。下。震。動。藩。王。如。尙。之。信。耿。精。忠。將。軍。如。孫。延。齡。總。督。如。
鄭。蛟。麟。金。光。祖。巡。撫。如。劉。秉。政。羅。森。曹。申。吉。提。督。如。王。輔。臣。李。
本。深。馬。雄。線。國。安。嚴。自。明。等。並。從。賊。此。外。若。吳。之。茂。譚。洪。楊。來。
嘉。祖。澤。清。劉。進。忠。祖。宏。勲。阿。爾。泰。郭。義。張。星。羅。苗。之。秀。佟。國。卿。
等。並。降。於。賊。巡。撫。盧。震。華。善。等。則。棄。城。走。督。撫。死。節。者。范。公。承。
謨。甘。公。文。焜。馬。公。雄。鎮。朱。公。國。治。數。人。耳。然。殉。難。而。未。能。擊。賊。
也。總。督。如。蔡。公。毓。榮。李。公。之。芳。能。擊。賊。矣。又。皆。與。王。師。並。進。

禁旅之功爲多。獨公以戍卒倡義以賊攻賊。未費公家斗粟寸
刃。恢復桂林。梧。潯。地。千餘里。厥功尤爲奇偉。亂之初。生闔門死
難。至百四十餘人。功在垂成。誤被賊紿。大罵不屈。以死。公可謂
義烈奇男子也矣。二十一年。勅建雙忠祠於廣西。以公與馬
公雄鎮並祀。從巡撫郝浴請也。雍正中。詔入祀昭忠祠。子明
垣由廕生官知州。

馬文毅公事畧 子世濟等

馬公雄鎮字錫蕃號坦公漢軍鑲紅旗人世居遼陽祖與進官訓導明天啟辛酉遼有兵禍訓導公率鄉民捍城甚力妻趙氏聞訛言城破遽驅女孫入井領家人四十餘口同日死父鳴佩字潤甫從龍入關順治元年由部郎出爲汾潞道數立戰功流賊一隻虎犯岢嵐州設伏擒之尋逸去授計郡將馳騎縛歸羣盜駭散超擢戶部侍郎王師征江南督餉不乏總督宣大開屯地二千六百餘頃加兵部尙書任兩江總督拔梁化鳳於偏裨中薦其有大將才使破賊於崇明使南贛兵敗僞伯陳其倫於瑞金威名旣著招降海寇甚眾以疾乞休薨子一卽公也順

治十三年由任子授工部副理事官累遷左僉都御史國史院學士康熙八年授山西巡撫未之任改廣西巡撫時左江奸民楊其清等妖言煽眾謀不軌右江妖僧假明宗室爲亂羣盜莫扶化等結同黨掠梧平二郡公悉討平之疏請定邊俸陞遷之例除兵糧運費去採買之累皆得旨允行十二年吳三桂反雲南明年二月廣西將軍孫延齡叛應之殺都統王永年孟一茂等圍巡撫署以爲命遣公衣冠脅降時巡撫無標兵公督家丁拒戰移檄梧州趣提督馬雄赴援雄不至公朝服自經爲家人救免乃以蠟丸馳請遣僕賀微遁入京告變尋遣承差楊啟祥引長子世濟遁又許募客李子燮朱昉挾次子世永孫國楨

遁先後由閒道歸京師。且疏言人心不甘從逆。若大軍速至。恢復廣西。則三桂腹背受敵矣。延齡瞰知之。繫公及家屬四十餘人於土室。公絕粒數日不死。拔刀自刎。守卒奪刀落。卒四指。又不得死。遂闔室被幽。歷四載。三桂遣使招之。公麾其使誓不屈。先是慶陽知府傅公宏烈以豫發三桂逆謀。坐誣謫戍梧州。至是勸延齡反正。延齡猶豫不決。十六年十月。三桂遣從孫世琮收兩粵。斬延齡。擁公至賊壘。百計誘降。且肆盛筵示禮敬。公大罵曰。吾奉命巡撫廣西。義守封疆。恨不能寸斬汝以報國。今討賊不遂。死吾分也。賊不能堪。十月十二日。押公至烏金埔。戕公幼子世洪。世泰以懼之。公罵益厲。且曰。吳三桂能舍其父。我

獨不能舍其子耶。手奪兩兒頭擊賊。遂被害。時年四十有四。從者馬雲皋。唐進寶。諸應兆等九人見公死。交口躍罵賊。駢戮之。咸引頸受刃。時眷屬尙羈土室。聞變。世濟妻董氏先就縊。繩絕仆地。觸首面俱碎。復投縋死。公妾顧氏。劉氏女二人。世濟妾苗氏。以次縊。夫人李氏坐觀之。使各就衾殮。然後北向再拜。自縊。時年三十有九。僕婢十有八人皆殉焉。守卒感其義。私記各尸。焚瘞廣福寺後。公尸暴露四十餘日。賊將趙天元過之。見公展兩臂枕兩兒尸下。馬再拜亦殮葬。寺側傅公宏烈時爲撫蠻滅寇將軍。駐梧州。幕客孫成陳文煥乘間脫走。由平樂達蒼梧。具公死事狀。丐傅公入告。並以公所著笏孽樓遺稿及彙草辨疑。

歸之世濟傳公疏聞。

聖祖嘉公忠烈。下所司議卹。贈太子太保兵部尙書。賜祭。

葬諡文毅。李氏董氏各予誥贈。公之在土室也。家屬以飢寒死者凡十九人。公若弗聞也者。日以賦詩臨池。自遣。姬顧氏本吳中女士。精小學說文。公撰彙草辨疑十二卷。姬皆手爲旁訓。其造世濟行也。全州人易友亮竇導之出。及世永國楨之行。年俱幼。賊伺之甚密。友亮復與州人唐守道。唐正發謀穴垣出之。初公陞辭。

上解御衣以賜。及聞延齡被殺。度必死。乃以衣授友亮。使先遁。懼汚君賜也。世濟至粵。西友亮獻衣。述遺命。世濟歸奏。

上仍以衣賜世濟。授世濟大理少卿。友亮守道正發。及楊啟祥。授游擊守備。孫成。陳文煥。授同知。知縣有差。十八年。世濟請赴廣西收父母骸骨。命馳驛往。明年喪至京師。

上遣大臣奠醊。並賜御書碑文立墓道。又允巡撫郝浴請。建雙忠祠於桂林。祀公及傅公宏烈。二十一年正月。宴羣臣於乾清宮。以世濟爲殉難撫臣子。特命至御座前。賜酒。世濟時官光祿卿。累遷吏部侍郎。貴州巡撫。漕運總督。世永官至鹽運使。國楨官江南常鎮道。雍正中。詔祀公昭忠祠。乾隆十六年。

上念公爲國効忠。特予雲騎尉世襲罔替。

陳忠毅公事畧 葉忠節公映攝

陳公丹赤字獻之號眞亭福建侯官人順治十七年由舉人授重慶推官。歷權重慶夔州二府。有能名。康熙元年舉卓異。遷刑部主事。再晉郎中。時有冤獄宜末減者。公與同官議不協。主者以兩議上。

上卒從公議。十二年授浙江溫處道。寬海禁。民慶更生。旋權按察使事。十三年四月入覲。還至東昌。聞逆藩耿精忠叛。瞿然曰。溫州與閩接壤。爲浙東門戶。脫有失。如封疆何。乃舍舟登陸。兼程至維陽。乘解艇。三晝夜至杭州。入白大吏。馳還治所。繕城堡。練丁壯。爲固守計。人心以安。五月平陽逆弁司定猷倡亂。執

總兵蔡朝佐攻瑞安海寇乘閒肆掠鄉民爭入城總兵祖宏勳欲禁之公曰城所以衛民也有民不衛安用城命納之日馳牒乞援已而賊大至攻南門甚急公擐甲登陴用礮矢殺賊無算會宏勳有異志擁兵坐視與公城守者惟麾下及鄉丁各數百人而已越二日援師至營於江岸公趣使濟師宏勳恐六月初一日集在城文武官至大官亭要公計事左右或沮之公不顧策馬竟去至則慷慨陳說大義聞者皆感動一時將弁有自懷中出帛書者耿逆招宏勳獻城檄也公大聲曰吾輩受國厚恩誓死不貳此物奚宜至哉宏勳執公手好言慰之曰彼眾我寡獨不爲閩城生靈計乎且公閩人也骨肉墳墓皆在閩宜熟思

公神色愈峻。麾宏勲手曰：「吾知以死報國耳，不知其他。」起裂之。宏勲目千總高魁，持斧擁公出，公罵曰：「逆賊汝殺我，朝廷必寸磔汝。」魁以斧斷公右臂，遂遇害。永嘉知縣馬璆抗聲曰：「擅殺道臣，竟反矣。」亦被戕。役林義者，聞變馳而上，持槊大呼，擊傷數人，力竭死。十六年，浙撫上其事。詔下所司議卹，尋議贈光祿少卿。

上少之。語大臣曰：「漢官盡節，惟陳丹赤一人，宜優卹。」議贈光祿卿。仍命再議，乃議贈通政使。廕子一夔入監讀書。賜祭葬。三十三年，特賜諡曰忠毅。逾年，勅建雙忠祠於溫州。祀公及馬璆等。三十八年。

聖祖南巡。駐蹕杭州。一夔時爲湖州守。迎駕。諭曰。爾父
爲國殉難。朕至今憫之。賜御書名垂青史。額一夔守湖州有
善政。人方之陳幼學。以註誤免官。特旨改甯波守。會湖州饑。
大吏以一夔舊得民心。遣督賑。百姓遮道。譁曰。還我太守事。
聞詔從之。尋擢參政。卒。喪歸。湖人士奔號泣。奠數百里外。立祠祀
之。方耿逆之初變也。浙督李文襄屢使人調閩。虛實皆不返。以
忠毅閩人。遂屬遣家僕羅世安往。公殉節後。世安歸於軍前。悉
以其實告。文襄得所向有功。後十四年。上海葉忠節公有殉難
湖北之事。

葉公映樞。字炳霞。號蒼巖。江蘇上海人。順治十八年進士。選庶

吉士以江南奏銷案註誤降補國子博士遷戶部主事康熙十一年充陝西副考官晉郎中十七年擢陝西提學僉事以公明登薦牘二十四年授湖廣糧儲道二十七年五月督標裁兵夏逢龍作亂巡撫柯永昇禦賊被創自縊按察使丁煒棄家奔安慶時公署布政使賊迫受僞職公給以無殺掠百姓三日後當如所言乃令其妻奉母自水竄出避難以司道等五印付其僕葉華林令付所向衙門呈繳遂繕遺疏朝服望闕謝恩訖升公座罵賊拔佩刀自刎疏畧曰臣一介迂儒幸中進士叨受

皇上高厚深恩游擢今職嘗以潔己奉公自矢但愧才具庸劣未効寸長茲值裁兵夏逢龍倡亂劫奪撫臣勅令并分兵圍

臣衙門。露刃逼脅。臣幼讀詩書。粗知節義。雖斧鑕在前。豈肯喪恥偷生。彼時卽欲率同妻女。闔門殉節。第念臣母七十有六。在臣任所。臣長子葉塤。遠在原籍。其餘二子。尙未成童。熒熒孤弱。死將安歸。因遣妻女奉母潛逃。臣如微服匿影。或可倖免。以圖後効。伏念臣守土之官也。城存與存。城亡與亡。義所應爾。今勉盡一死。以報國恩。所恨事起倉猝。旣不能先事綢繆。歎銷反側。復不能臨時捍禦。獨守孤城。上孤三十載之皇恩。下棄七旬餘之老母。君親兩負。死有餘慚。雖么麼小醜。指日掃滅。不能忍死須臾。以觀蕩平也。

上覽疏畢。諭曰。城存與存。城亡與亡。人臣之義也。朕覽葉映

樞遺奏五內傷悼王大臣等其共聽之因命展讀奏疏聞者皆感泣遂諭吏禮二部曰葉映樞捐生殉難遺疏情詞慘烈朕心惻然不忍披覽其從優賜卹以表忠貞部議贈通政使廕一子入監讀書蓋援陳忠毅公例也特旨贈工部侍郎賜祭葬如典禮次年二月

聖祖南巡葉勇迎駕謝恩特命子諡以彰異數御書忠節二字賜之四十二年湖北巡撫年遐齡請建專祠於武昌賜御書丹心炳冊額學政胡潤請許公後裔建祠本籍有司春秋致祭從之雍正二年入祀昭忠祠子勇官廣州知府公所著曰葉忠節集

莽襄壯公事畧

公諱莽依圖。姓兆佳氏。滿洲鑲白旗人。父武達禪。崇德三年。隨睿忠親王伐明。攻直隸任邱。山東濟陽。並先登。賜號巴圖魯。子騎都尉加一。雲騎尉。順治七年冬。公襲職。兩遇恩詔。晉輕車都尉。十五年。隨征南將軍卓卜特。征明桂王。至貴州。明年。自都勻進師盤江。僞晉王李定國據雙河口。悉眾爲三十營。列象陣拒戰。公率步兵衝擊破之。隨大軍定雲南。康熙二年。隨靖西將軍穆哩瑪。征湖南流賊李來亨等。賊據茅麓山。列寨拒守。公冒矢石進攻。毀寨二。賊大敗。來亨自經死。凱旋。授協領。十三年。吳三桂陷湖南。公隨征南將軍尼雅翰。率師進勦岳州。用紅夷

破擊沈賊舟。敗賊七里橋。多斬馘。十四年。三桂遣賊將董重民。結廣西叛鎮馬雄犯廣東。平南王尙可喜。上疏請兵。詔尼雅翰率師至廣東。公時署副都統。駐守肇慶。十五年。可喜子之信。叛降三桂。受僞爵。三桂遣將范齊韓等逼肇慶。總督金光祖降賊。公率步兵突圍出。且戰且走。還駐江西。僞將軍黃士標等。糾眾犯信豐。公率兵往援。與城內兵奮勇夾擊。大破之。賊遁走入山。復追敗之。圍遂解。十六年。授江南副都統。時廣東尙爲賊將董重民所踞。

上命公爲鎮南將軍。率師恢復。以副都統額赫訥。穆成額。參贊軍務。四月。自南康至南安。僞將軍嚴自明以城降。遂偕額赫訥。

等進征南雄。僞將軍宋思政等迎降。尚之信亦擒重民。率藩屬歸順。公進韶州。疏言南安南雄韶州所屬文武官弁。昔雖迫於賊勢。致污僞職。今旣望風款附。請令暫畱原任。綏撫殘黎。以安反仄。

上特允所請。且嘉其進兵迅速。尋命侍讀學士顧入代赴軍前傳諭。擇便而行。時賊將胡國柱馬寶糾賊眾萬餘犯韶州。公擊卻之。九月賊復據河西。斷我水運餉道。列營蓮花山以瞰城中。會將軍額楚率江甯兵至。與城內軍夾攻。破其四營。斬獲甚眾。賊敗竄帽峯山。我軍乘夜追擊。大敗之。河西賊亦遁。水運遂通。十月追擊至樂昌。賊據風門澳拒守。我軍三路仰攻。別令

猛兵由閒道奮擊擒斬二千有奇。乃撫定仁化。仍回駐韶州。疏言將軍傅宏烈以五千兵獨當西路。恐力不支。已遣額赫訥赴梧州協勦。諭獎其智勇兼優。應機適變。十七年春三桂遣其孫世琮陷桂林。馬寶亦由宜章陷平樂。

上命公赴廣西。與傅公會師勦賊。二月疏言臣抵平樂圍其城。賊水陸抗拒。宏烈所率綠旗兵與戰不勝。臣孤軍難久留。因退駐中山鎮。宏烈亦以公所率滿洲兵不相應援。入奏。

上念擊賊失利。因江水泛漲。故並免其罪。諭令和衷協濟。公尋以賊逼賀縣。回梧州乞罷將軍任。

上切責之。仍畱任。圖功贖罪。明年三月吳世琮犯梧州。公同傅

公率師拒戰。賊大敗。棄營遁。先是偽將軍馬承廕以南甯降。至是賊由梧州敗竄。糾眾犯南甯。六月城中食盡。旦夕且陷。公方臥病。聞之。督師倍道進。賊悉銳聚新村。列鹿角。西山拒戰。額赫訥等引前鋒軍擊之。賊稍卻。公與將軍舒恕麾大軍進而預遣左翼兵潛出山後截賊歸路。盡殪之。世琮負重創。以數十騎越山遁。南甯圍解。

上以廣西底定。命進取雲貴。九月公以馬承廕雖降。心懷叵測。恐爲肘腋患。上言湖南大兵在武岡禦賊。臣等一軍先向雲南。恐諸路軍不相應援。且廣西新定。若無兵駐守。恐有他虞。請暫駐南甯相機進剿。

上命簡親王喇布鎮桂林。公侯都統希福兵至。取道恢復疆土。十九年。授護軍統領。五月。馬承應叛於柳州。公帥師進剿。次來賓。承應驅象陣迎戰。我軍以勁弩射之。象回奔。賊陣亂。麾軍奮擊。賊大敗。棄甲狂奔。公自率輕騎追擊。獲象三。斬馘無算。會簡親王遣將分路剿賊。皆大捷。承應復降。柳州平。八月。公薨於軍。年四十有七。二十二年。議政王大臣等追論公征廣西時。自平樂失機。退梧州。應籍家產之半奪。恩詔所得騎都尉。

上曰。葬依圖在行間。甚著勞績。且屬下兵民俱稱其善。凡所過地方。亦不擾害百姓。可免籍家產。奪恩詔所加世職。其原襲之騎都尉。加一雲騎尉。以其弟博和哩襲。五十九年。入祀廣西名

宦祠雍正十年

詔入祀京師賢良祠乾隆元年追諡襄壯

佛恭靖公事畧 子忠勇公額稜特

公諱佛尼勒。姓科奇哩氏。滿洲鑲紅旗人。世居瓦爾喀。父索勒和諾。少孤。其兄瑚里納撫之成立。瑚里納爲仇所害。索勒和諾手刃其仇。祭兄墓。崇德三年來歸。任驍騎校。七年。隨饒餘貝勒阿巴泰攻明河間府。首緣雲梯登城。戰歿。子世職騎都尉。公襲職。順治五年。授佐領。時流賊李自成餘黨竄踞陝西湖北。錯壤山峪。公隨大軍征勦。擢協領。晉輕車都尉。康熙八年。擢西安副都統。十三年春。命同西安將軍瓦爾喀由四川進討逆藩吳三桂。師行至棧道。聞四川郡邑皆附賊。叛鎮譚洪據陽平關。公同瓦爾喀及前鋒統領穆占等率兵自野狐嶺進征。斬賊三千。

餘賊棄關遁。繼敗賊將吳存禮於朝天關。追至沙河驛。偽總兵彭時亨以舟師逆戰。擊敗之。奪其戰艦四。遂進征保甯。叛鎮吳之茂糾賊抗拒。我軍鑿壕堙與相持。尋以糧艘爲賊所劫。饋不繼。移師還駐漢中。賊中途邀阻。公同興安總兵王懷忠擊走之。又敗賊於槐樹驛。小郿嶺。十二月。提督王輔臣叛於甯羌。據平涼秦州。十四年。公擢西安將軍。加振武將軍銜。隨貝勒洞鄂進征。賊將高鼎聚賊四千於關山河岸。立寨拒守。公同穆占等整軍接戰。自巳至午。斬獲甚衆。遂大破賊寨。乘勢追擊。復敗賊於渭河橋。進薄秦州。賊伺我師壁壘未定。猝從城內衝出。冀掩我不備。公率軍遮擊。賊不能犯。旋攻克東西二關。有夜犯正黃旗。

者奮擊殲之。賊以眾數千掠仙遊關。公分兵赴援。賊聞我軍至。卽踰山遁。公追蹙之。搜勦畧盡。因令參領嵩祝留守仙遊關。而自率兵趨隴州。賊縱火山澤。踞公曰。賊謀欲燒絕我軍進路耳。若不增兵策應。則軍食難以輓運。因駐兵隴州。防賊黨窺伺。時大兵攻秦州。數月不下。賊在四川平涼者。挾眾萬餘來援。城中賊出應者亦八千餘。公還自隴州。與大兵合擊。擒斬偽總兵李國棟。胡茂。白光。王永元等。殲賊三千餘。遂復秦州。下禮縣。西河。清水。伏羌。諸邑。

上命公領兵開棧道。援將軍錫卜臣於漢中。賊於長甯驛滴水崖及插屏嶺屢抗我師。擊之皆潰。竄招撫陷賊村寨。居民三千

餘人十五年二月吳之茂糾賊萬餘犯秦州公同提督王進寶督兵禦戰斬級二千餘生擒偽總兵徐大仁獲輜重器械無算三月偵賊由禮縣運糧因遣兵邀擊於鹽關及羅家堡牡丹園擒斬護糧賊眾獲馬贏盡焚其糧尋擊敗偽總兵李國良等於清水縣復靜甯州六月復擊敗吳之茂於牡丹園進勦至西河北山之茂僅以十餘騎遁十六年追論前此自保甯退歸漢中諸將罪降世職爲騎都尉削振武將軍銜仍署西安將軍事十七年同副都統吳丹等連敗賊眾於牛頭山香泉等處引兵駐守寶雞防棧道諸險要賊窺棧道之益門鎮擊卻之十八年隨撫遠大將軍圖海進征興安偵賊在梁河關公領隊先驅至火

神崖擊走僞總兵王遇隆。遂渡乾玉河。拔梁河關。復興安城。尋會王進寶軍於保甯。十九年。同總兵王朝海招降潼川府城及鹽亭中江射洪諸縣。又敗賊於豹子山。諸處賊渡江遁。遂復瀘州。冬。逆賊吳世璠使胡國柱等糾賊踞敘州。陷永甯。詔授公建威將軍。調遣永甯兵一路勦賊。二十年春。賊眾二萬餘犯寶壩大溪口。諸處公率兵進擊敗之。賊將宋國輔詣軍門獻永甯府降。國柱亦棄敘州遁。公奉命駐守敘州。八月。命統西安滿兵征四川者。還鎮漢中。二十一年九月。薨於位。雍正十年入祀賢良祠。乾隆元年。追諡恭靖。第三子托琿襲世職。官至黑龍江將軍。

次子額稜特當公卒時特旨留西安補用二十三年補佐領三十年厄魯特巴圖爾額爾克濟農劫掠喀爾喀扎薩克丹津部眾

上遣將軍尼雅翰率師往宣詔旨令還所掠人畜率部眾徙居察哈爾地巴圖爾額爾克濟農不從以其眾奔竄額稜特隨大軍追之不及擒獲蒙古二人復隨將軍郎坦出嘉峪關追獲蒙古七人三十五年

上親征噶爾丹額稜特隨大將軍費揚古由西路進大敗賊眾於昭莫多予雲騎尉世職擢協領四十二年駕幸西安閱武設宴特召額稜特近御座前親賜之酒尋遷副都統

四十九年授湖廣提督

上復念其奉職清貧。詔總督巡撫等量爲資助。五十二年擢湖廣總督。宣布德威。紅苗歸化。

上諭閣臣曰。額稜特殷泰。皆朕特用之人也。初用時。人不知其善。後乃稱朕有知人之明。時江蘇巡撫張伯行亦以廉潔著。諭廷臣曰。天下督撫。惟額稜特張伯行操守最優耳。旋奉命與戶部郎中幹琿泰履勘湖南諸州縣廢壞。共四萬六千餘頃。疏請聽民墾闢。俟六年後。科以下則下部議行。五十四年山西太原知府趙鳳詔貪墨不職。公奉詔往勘。得實疏言。枉法受賄。例應縲首。鳳詔爲左都御史趙申喬之子。受恩深重。法應加

等擬監候斬九卿擬改立決。鳳詔遂伏誅。時厄魯特策妄阿拉布坦率賊眾犯哈密。

上遣尙書富甯安等調兵進剿。擊敗賊眾。策妄阿拉布坦遁走。於是領兵大臣等定議。先取烏梁海土魯番諸部。而後進征厄魯特。五十五年。命署西安將軍。事同總督。鄂海協理軍餉。十月。策妄阿拉布坦驅賊眾過沙拉。執青海臺吉羅卜藏丹濟布而遠遁。

上慮賊酋由噶斯口復犯青海。乃詔公統重兵移駐西甯。爲青海諸部應援。五十六年。奉諭往巴里坤。與將軍富甯安會議。集驛準噶爾邊界。及留後接應事宜。十月。策妄阿拉布坦令

辛桑領賊眾。阿哩克路潛去。公奉 敕回駐西甯。

上遣侍衛諾爾布等至青海。令諸臺吉協力勦禦。且 諭曰。將軍額稜特。方畧過人。其同心會議。旣而青海親王羅卜藏丹津。疏言策妄阿拉布坦。遣其屬策凌敦多布。往掠西藏。欲滅拉藏汗。公奉 旨。與內大臣策妄諾爾布。統兵駐守青海。防歸途擄掠。

上復敕西甯松潘各路備兵。爲拉藏救援。 詔額稜特青海王臺吉等。會議屯軍形勝之地。公疏言西甯抵藏之路有三。惟庫庫賽爾嶺。及拜都嶺二路較殊爾肯一路寬廣易行。請與侍衛色稜分道進剿。若賊眾一路拒敵。則我師別有閒道。可以直入。

藏地。攻其後。若賊分路拒我。其勢既分。亦無難於翦滅。

上命與諸將定議以行。五十七年夏。偵知賊眾戕殺拉藏汗於布喇城。執汗子蘇爾咱而踞其地。西藏人來歸者。公妥爲安撫。六月。與侍衛色稜分路進師。親帥大軍。自穆魯斯烏蘇啟行。至圖勒哈。以皮船濟。因取道庫庫賽爾嶺。七月。抵齊諾郭勒。賊乘夜侵我軍壘。遣將擊敗之。次日。賊復從東路來犯。公親率弁兵緣山接戰。自寅至巳。賊潰遁。追擊十餘里。多所斬獲。得旨優敘。未幾。賊首托布齊等。以眾數千。潛由喀喇烏蘇來拒我師。公率所部疾趨。飲先渡河。扼狼拉嶺之險。以禦賊。比至喀喇烏蘇。侍衛色稜等。亦以兵來會。併力進擊。屢敗賊眾。賊復聚眾數萬。

環集來攻。公領兵奮擊。身被重創。戰益力。與賊相持。月餘。至九月。自知眾寡不敵。仍厲兵進戰。射殪賊眾無算。矢盡。持刀奮呼。斫賊。賊益兵圍之。公中傷。猶力戰。遂歿於陣。五十八年。櫬還京。命親王及貝子公等迎至城外。復遣內大臣侍衛至其家奠茶酒。雍正元年。特予三等輕車都尉。賜祭葬如典禮。諡忠勇。入祀昭忠祠。子愛山襲職。

楊清端公事畧 于文乾

楊公宗仁字天爵漢軍正白旗人父朝正諱在循良傳康熙三十
十五年公由監生授慈利知縣調藍山巡撫趙申喬疏薦卓異
累遷階州知州蘭州同知總督殷泰巡撫鄂奇復疏薦五十年
夏遷臨洮知府五十二年巡撫岳拜薦公老成練達有守有才
擢西甯道累遷浙江廣西按察使署廣西巡撫五十七年擢廣
東巡撫

上以直省錢糧虧空多令各督撫立法清理公疏請令督撫司
道府廳交相砥礪無論正雜錢糧知府不時盤查庫銀隨征隨
解米穀實貯在倉若州縣自行挪用知府豈肯代爲彌縫甘蹈

分賠之咎州縣既無由挪移掩飾卽虧缺諒必無多補足亦易
若地方有不得已之公務難責諸州縣獨賠又難使倉庫虧缺
應以督撫等公項銀抵補如不敷仍設法公捐總不使庫帑有
虛懸之弊下部議行六十年十一月

世宗御極授湖廣總督雍正元年丁母憂命在任守制公疏
請停給恩詔應得封廕爲父母求諭祭得旨俞允仍給
封廕尋賜孔雀翎四月疏言湖廣素稱俗薄民刁兵驕吏玩
細究其故皆由文武各官向所屬官弁索取陋規節禮州縣必
致私派橫征武弁必致虛兵冒餉兵民挾此逞奸員弁遂不敢
過問臣今擬行禁革庶兵民不得藉詞逞私驕悍之習可杜又

言兩湖鹽價逐漸增長窮民怨嗟揆厥所由各官多貪鹽規漸次加至四萬從前一錢一包之鹽今則昂至一錢五六分不等臣今盡革鹽規令商人減價出售以惠窮民地方漸有起色手詔曰覽所奏朕深嘉悅在他人猶聽其言而觀其行至於爾則信而不疑矣斯乃全楚地方否極而泰之機也五月疏薦南海知縣宋瑋陞寶慶府左衛知縣范宗堯改補漢陽縣得旨姑允其請後勿踵行又疏言俸工一項乃朝廷祿養官役之恩豈可任意飾捐以填貪壑湖廣州縣以上俸工報捐已經十有餘年致官役楊腹從事焉能禁其需索閭閻今自雍正元年起凡官役應支俸工俱各照額編支領俾均沾實惠從前凡有公

事無一不令州縣分捐實皆派累百姓臣通盤核算但令州縣於所得加一耗羨內節省二分解交藩司以充一切公事費此外絲毫不許派捐至節禮陋規已概行禁革則州縣從前虧空亦易於補苴矣得旨所言全是一無瑕疵勉之尋因病請以子榆林道文乾隨任終養詔加文乾按察使銜馳驛赴楚並遣御醫診視七月疏言湖北糧道掌全省漕運兵精一歲中計有半年公出舊設驛鹽道管驛遞應付勘合火牌及淮鹽到楚盤驗察私督運額銷引日職守甚繁前督臣滿丕奏以驛鹽道歸併糧道似未妥協請復設以專責成下部議行九月疏言襄陽府屬樊城鎮五方雜處商賈輻輳奸宄易潛蹤請移襄陽同

知駐樊城彈壓從之。又言清盜源。察窩賭窩逃法。莫善於力行保甲。臣通飭所屬。鱗次挨編。聯絡守望。并專委本管道員稽察。如州縣奉行不得法。卽令指示照式編次。擇其善者予優獎。手敕報曰。此論甚當。凡舉行一法。必示以勸懲。方期有效耳。二年。疏言社倉實係美政。臣與各官加意講求。先擇地建倉。然後勸捐穀本出納。聽民自主。不許官吏會計侵肥。并立獎掖。尙義之典。士民咸踴躍爭先。江夏武昌蒲圻等二十州縣各建倉三五十所不等。共捐納穀本將三十萬石。效驗已著。臣又飭湖南如法施行。得旨。社倉先成創始之功。殊可嘉尙。三年。諭獎督撫中居官行己可風有位者。加公太子少傅。七月。薨於位。年

六十有五遺疏入得。旨。楊宗仁敬慎持躬。廉能供職。自簡任總督以來。潔己奉公。孤介端方。始終一節。忽聞溘逝。朕追念良臣。深爲悽惻。難釋於懷。應沛特恩。以示優眷。其卹贈少保。並給騎都尉世職。仍察例子卹。賜祭葬。諡清端。御製像贊。有廉潔如冰。耿介如石之句。八年。詔祀賢良祠。公在湖廣久。廉潔勤敏。鹽商歲餽數萬金。及諸饋遺。概屏絕。每春。輕騎出郊。勸農出私財充賞。諄諄教以孝弟忠信。瀕水隄防。歲時巡行。修築年獲屢豐。鄰境偶有饑民。入楚先賑。以粥繼卽。按名給米。寒子衣歸給糧。所全活無算。馭屬吏嚴而不殘。尤加意武備。考校精核。標兵按期親閱。賞罰公而明。士卒競奮疾革。前數日猶閱兵不。

少怠。士民立祠祀之。仍入祀湖廣名宦。

子文乾。由監生効力永定河工。康熙五十三年。授曹州知州。遷東昌知府。旋擢榆林道。雍正元年。隨父任侍疾。三年。授河南布政使。擢廣東巡撫。賜孔雀翎。及冠帶鞍馬。尋丁父憂。命在任守制。十二月。奏言。臣自楚赴粵。途中聞告休布政使朱絳。倚總督孔毓珣姻親。虧帑三萬餘兩。交代未清。卽嚴飭作速賠補。上諭。此項挪用。曾經孔毓珣奏明。爾等宜以和爲主。勿聽離間之言。又奏言。盜案塵積。已飭屬概爲速結。諭以秉公嚴催。詳情度理爲之。四年。疏陳舉保甲以弭盜風。奉旨嘉獎。又疏劾將軍李枚。囑令縱釋鼓衆搶穀之旗兵。乞

上遣大臣來粵定讞。詔侍郎塞楞額等往訊得實。枚等論如律。又疏請將廣東丁銀盡歸地糧。以免無糧徵銀之累。

上允之。十二月疏言廣東地狹人眾。米不敷食。宜預先積儲。應酌量要地加貯穀石。以便撥運。疏下九卿議。以濱海地不宜收貯。恐致滯爛。惟惠潮瓊三府僻處海隅。難於挽運。可酌貯。五年乞假葬父。允之。福建巡撫常賚疏劾文乾貪婪各劣蹟。上以所奏銀數未晰。著將楊文乾見小漁利之處。據實入告。常賚復將例外求索處具奏。疏入。

上切責之。八月。

上以閩屬虧帑甚多。命文乾同浙江觀風整俗使許容等往。

查文乾疏報委員署印盤查并將各員離任調用。以免挪新掩飾。得旨。勉力爲之。旋報素產米穀之州縣。現已買足。餘請寬限陸續買足。逾限參究。

上諭將通省人員於此次倉穀案內。察其善者畱之。劣者去之。并勉以秉公辦理。十二月文乾查明福建倉庫。官虧者勒追補完。民欠者陸續催徵。無可著追。及平糶存價採買不敷者。令前任巡撫毛文銓償補。詳悉入奏。詔嘉其秉公辦理。毫無瞻顧。命優敘。又疏稱閩省八府一州。知府同知通判州縣共八十員。前後參革改教休致五十餘員。其倉庫無虧。官聲尙好之縣。令十餘員已交錯調用。不使回原任。致滋弊端。所出缺於先後命

發人員內量才題補。惟是瀕海重地。俗悍民刁。新補各官。皆係初任。責其典守倉庫。則有餘資。其治理繁劇。則不足乞。

皇上再將熟諳民事者。發數員。交督撫於緊要縣缺補用。得旨。此奏可嘉之至。尋諭各省督撫。除川陝雲貴廣西外。每省

於歷任年久知縣內。擇謹愼敏練者一員。一面具奏。卽行咨送。閩省交楊文乾等酌補緊要縣缺。六年疏劾廣東布政使官達。用幕友招搖納賄。及署巡撫阿克敦勒索暹羅船戶規禮銀。

詔革官職。命文乾同總督孔毓珣會訊。未及訊。以疾卒。得

旨。楊文乾才識優長。辦事勤敏。自閩回粵。五月間。卽患畏風心煩之症。而急公心切。不以病狀奏聞。洵屬殫力封疆之臣。應得

卹典所司察例具奏。其靈輓起程日。著省城官吏齊集奠送。所過廣東地方。文武官親往奠醊。並遣人護送。其經過別省。亦著地方官照料。尋賜祭葬如例。子應璠。由任子授員外郎。出爲山西河東道。乾隆十四年。擢甘肅按察布政使。就遷巡撫。調山東。署河督。十九年。署兩廣總督。二十二年。調閩浙。加太子太保。逾年。調督陝甘。辦理伊犁等處屯田。稱旨。嗣因西陲辦理回務。改甘肅總督。駐肅州。晉太子太師。二十九年。詔裁甘肅巡撫。令總督移駐蘭州。拜東閣大學士。留督陝甘如故。三十一年。以征莽匪故。調雲貴總督。尋爲提督李時升。總兵朱崙所誤。致債事。削籍逮問。賜自盡。